

BIZKAIKO BERTSOLARI TXAPELKETA: 50. URTEURRENA. BARAKALDO

2008ko abenduaren 20an, BECen jokatu zen Bizkaiko Bertsolari Txapelketan Euskaltzaindia ere izan zen. Izan ere, Akademiaren izenean, Adolfo Arejita euskaltzain osoak saria eman zion Unai Iturriaga aurtengo txapeldunordeari. Saria Xabier Santxotenenaren «Eguzkilorea» izeneko eskultura izan zen.

Bizkaiko Bertsozale Elkartek bestalde, Valentin Lakaren eskultura bat eman zion Euskaltzaindiari, Bizkaiko Txapelketaren 50. urteurrenean. Bertan «Bizkaiko Bertsolari Txapelketa 2008. 1958-2008» irakur daiteke.

Orain dela mende erdi bat, 1958ko abuztuan, Bizkaiko Lehen Bertsolari Txapelketa egin zen, Euskaltzaindiak antolaturik. Alfontso Irigoien euskaltzaina ibili zen antolakuntza lanetan.

Txapelketa abuztaren 24an egin zen, Bilboko Areatzan, txapelduna Barendin Enbeita izan zelarik. Juan Ormaetxea «Taket» izan zen txapeldunordea, Jose Alberdi hirugarren geratu zen, Asensio Bidaurreazaga laugarren, Eusebio Zubiaga bosgarren, eta azken biak Pedro Kastrejana eta Florentzio Zarraga izan ziren.

2008ko txapelketa aurkezteko egin zen prentsaurrekoan –abenduaren 15ean, Durangon– hori guztia gogoratu zuen Jose Luis Lizundia euskaltzain oso eta diruzainak. Harekin batera Jon Azpillaga bertsolaria, Karmelo Uriarte Bizkaiko Bertsozale Elkarteko lehendakaria eta aurtengo zortzi finalistak izan ziren.

Jakina denez, Igor Elortza izan da 2008ko txapelduna.